

Mick Antoniw AS/MS
Y Cwnsler Cyffredinol a Gweinidog y Cyfansoddiad
Counsel General and Minister for the Constitution



Llywodraeth Cymru
Welsh Government

Eich cyf/Your ref
Ein cyf/Our ref

Huw Irranca-Davies AS
Cadeirydd
Y Pwyllgor Deddfwriaeth, Cyfiawnder a'r Cyfansoddiad
Senedd Cymru

4 Awst 2022

Annwyl Huw

Diolch am eich llythyr ar 30 Mehefin ynghylch fy ymddangosiad yn y Pwyllgor Deddfwriaeth, Cyfiawnder a'r Cyfansoddiad ar 20 Mehefin. Roeddwn yn croesawu'r cyfle i siarad â'r Pwyllgor am yr ystod helaeth o faterion a gwmpaswyd. Rwyf wedi darparu ymateb manwl i'ch cwestiynau pellach mewn Atodiad i'r llythyr hwn.

Yn gywir

A handwritten signature in blue ink that reads "Mick Antoniw". The signature is written in a cursive style and is underlined with a single horizontal line.

Mick Antoniw AS/MS
Y Cwnsler Cyffredinol a Gweinidog y Cyfansoddiad
Counsel General and Minister for the Constitution

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Mick.Antoniw@llyw.cymru
Correspondence.Mick.Antoniw@gov.Wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Atodiad

Y broses cydsyniad deddfwriaethol

- 1. Wrth ymrwymo i'w chytundeb cydweithio â Phlaid Cymru, diwygiodd Llywodraeth Cymru ei Rhaglen Lywodraethu bum mlynedd. O ystyried bod cynsail yn bodoli o ran cyhoeddi diwygiadau i'r Rhaglen, a oes unrhyw reswm pam na ddylai Llywodraeth Cymru gyhoeddi diweddariadau rheolaidd a fyddai'n rhoi eglurder ynghylch pa Lywodraeth a pha Senedd fydd yn deddfu er mwyn cyflawni ymrwymïadau penodol?*

Rydym wedi ymrwymo i roi'r wybodaeth ddiweddaraf yn rheolaidd am ein bwriad o ran defnyddio Biliau'r DU, ac rydym wedi gwneud hyn, er enghraifft, drwy ddatganiadau ysgrifenedig am ein gwaith gyda Llywodraeth y DU ar y Bil Caffael. Fodd bynnag, nid wyf yn credu ei bod yn addas gwneud diwygiadau i'r Rhaglen Lywodraethu bob tro y bydd Senedd y DU yn gwneud deddfwriaeth mewn perthynas â Chymru.

Fel yr amlinellais yn fy llythyr ar 17 Mehefin, nid yw Llywodraeth Cymru fel arfer yn mynd at Lywodraeth y DU yn bwrpasol i geisio darpariaethau datganoledig ym Miliâu'r DU. Fel y nodais, yn aml, pan wneir darpariaeth ddatganoledig yn un o Filiau'r DU, mae Llywodraeth y DU wedi cynnig cyfle i Lywodraeth Cymru gynnwys darpariaeth o'r fath. Proses ailadroddol yw hon yn aml, pan fyddwn yn trafod darpariaethau â Llywodraeth y DU yn gyfrinachol, gyda'r bwriad o ganfod ffordd ymlaen a fyddai'n galluogi Gweinidogion Cymru i argymhell wrth y Senedd ei bod yn pleidleisio o blaid rhoi cydsyniad deddfwriaethol, pan fo modd. Fel y dangoswyd gan sesiwn flaenorol Senedd y DU, nid yw'n anghyffredin i'r safbwynt terfynol hwnnw o ran argymhell cydsynio gael ei gyrraedd yn hwyr mewn hynt Bil. Nid wyf felly o'r farn y byddai proses o ddiweddarau'r Rhaglen Lywodraethu er mwyn rhannu'r math hwn o wybodaeth yn ymarferol, gan nodi hefyd y diweddariadau amserol yr ydym yn ceisio'u rhoi i'r Senedd a'i Phwyllgorau perthnasol.

- 2. Mae Llywodraeth Cymru yn cyhoeddi rhaglen deddfwriaethol ar gyfer pob blwyddyn o fewn tymor pum mlynedd yn y Senedd. Gwnaethoch ddweud wrthym y byddai'r cyhoeddiad nesaf ar 5 Gorffennaf. Gan gydnabod y posibilrwydd y gallai cyhoeddiadau deddfwriaethol gan Lywodraeth Cymru a Llywodraeth y DU fod yn destun amserlen wahanol, dylai fod yn ymarferol rhoi syniad, yn y cyhoeddiad blynyddol, o'r gwaith rhynglywodraethol sy'n cael ei wneud ar hyn o bryd ar Filiau'r DU, lle mae Llywodraeth Cymru yn ceisio darpariaethau ar gyfer Cymru mewn meysydd datganoledig. A oes unrhyw reswm pam na ddylai Llywodraeth Cymru gynnwys y wybodaeth hon yn ei datganiadau deddfwriaethol blynyddol, gan ddarparu hefyd ddiweddariadau tymhorol yn ôl yr angen?*

Fel yr amlinellir uchod, ni fyddem yn mynd ati'n aml i geisio darpariaeth i Gymru yn rhagweithiol; mae'n broses fwy adweithiol yn aml. Yn yr achosion hynny pan fu inni geisio darpariaeth, neu pan fyddwn yn bwriadu cytuno ar ddarpariaeth ym Miliâu'r DU, mae'n ymrwymiad gennyf sicrhau bod y Senedd yn parhau i gael ei hysbysu pan ddaw'r cyfle ystyrion cyntaf, yn hytrach na chynnwys gwybodaeth yn y datganiad deddfwriaethol blynyddol.

- 3. O ran y gwaith deddfu y mae Llywodraeth Cymru yn ei wneud ei hun ar gyfer Cymru, gwnaethoch nodi nad yw capasiti o fewn Llywodraeth Cymru yn broblem, o ran y pethau yr ydych am eu gwneud (Cofnod y Trafodion 44 a 46). A yw hyn yn golygu y bydd*

Llywodraeth Cymru, i bob pwrpas, yn dyrannu adnoddau i nifer benodol o Filiau ac yna'n manteisio ar y cyfleoedd a gyflwynir iddi i ddefnyddio Biliau'r DU i gyflawni amcanion deddfwriaethol eraill nad ydynt eisoes wedi'u nodi (neu nad ydynt wedi'u blaenoriaethu)?

Ydy, i'r graddau y mae ein rhaglen deddfwriaethol wedi'i chynllunio i gyflawni uchelgeisiau'r Rhaglen Lywodraethu, ac felly mae'n anochel ein bod yn ceisio sicrhau bod capasiti yn ei le i gefnogi'r gwaith hwnnw. Roedd ein hegwyddorion yn nodi, pan fyddai deddfwriaeth y DU yn briodol i Gymru ond nad oes amser i gyflwyno'i thebyg yn y Senedd, y byddem yn ystyried defnyddio un o Filiau'r DU. Mae hwn yn safbwynt ymarferol, sy'n sicrhau ein bod yn cyflawni dros bobl Cymru ac yn defnyddio'r adnodd a'r cyfleoedd sydd ar gael yn y modd gorau. Fodd bynnag, fel y nodwyd uchod, nid yw Llywodraeth Cymru fel arfer yn mynd at Lywodraeth y DU yn bwrpasol i geisio darpariaethau datganoledig ym Filiau'r DU.

4. *Yn eich llythyr dyddiedig 20 Ebrill gwnaethoch ddweud: Felly, rydym yn penderfynu beth yw'r ffordd orau o wneud hynny drwy deddfwriaeth y Senedd a Senedd y DU, gan ystyried blaenoriaethau a chapasiti ein rhaglen deddfwriaethol ein hunain a hefyd y cyfleoedd a'r risgiau posibl sy'n deillio o raglen deddfwriaethol Llywodraeth y DU. Pe na baem ond yn cyflawni ein blaenoriaethau drwy deddfwriaeth y Senedd, yn hytrach na mynd ar drywydd set ehangach o flaenoriaethau drwy'r ddwy raglen deddfwriaethol, byddem yn cyflawni llai ar gyfer pobl Cymru."*
- i. A fydddech yn cytuno bod y llythyr hwn yn rhoi darlun gwahanol i'r farn a fynegwyd gennych wrth roi tystiolaeth, sef nad yw capasiti ac adnoddau yn rhwystr i'r broses o gyflwyno Biliau Cymreig (Cofnod y Trafodion 42-46)?*
 - ii. O ystyried y sylwadau yn eich llythyr, ac os oes gan Lywodraeth Cymru yr adnoddau i wneud yr hyn y mae am ei wneud, a yw'n iawn i feddwl bod angen cymorth llywodraeth wahanol a senedd wahanol ar Lywodraeth Cymru i greu a phasio deddfau mewn meysydd sydd wedi'u datganoli i Gymru?*

Nid wyf yn credu bod fy sylwadau yn rhoi darlun gwahanol i'r safbwynt a nodir yn y llythyr. Yn fy sylw i'r Pwyllgor, dywedais (Cofnod y Trafodion 44), "*So, the resources are there and the skills are there in terms of the Government's own legislative programme, in terms of the things that we want to do*". Mae hyn yn adlewyrchu'r ffaith bod ein Rhaglen Ddeddfwriaethol, pan gaiff ei chyflwyno gennym, wedi'i seilio ar waith blaenoriaethu a chynllunio o ran yr arbenigedd a chapasiti'r adnoddau sydd eu hangen i gyflawni'r Biliau, yn ogystal â'r amser sydd ar gael yn y Senedd. Mae fy llythyr yn cyfeirio at y penderfyniadau a wnawn mewn perthynas â deddfwriaeth Senedd y DU gan ystyried blaenoriaethau a chapasiti ein rhaglen deddfwriaethol ein hunain.

Ar ben hynny, ni fyddai'n gywir dod i'r casgliad y dewch iddo yn ail ran y cwestiwn. Ein hegwyddorion ynghylch deddfwriaeth y DU yw'r sail ar gyfer pryd y byddwn, o bosibl, yn ystyried defnyddio Biliau'r DU. Gall fod amgylchiadau pan fo hynny'n briodol – er enghraifft, fel yr amlinellir yn ein hegwyddorion, yn ogystal â'r pwynt o ran amseru, pan fo natur gydgyssylltiedig systemau gweinyddol perthnasol Cymru a Lloegr yn golygu mai'r ffordd fwyaf effeithiol a phriodol fyddai bwrw ymlaen â darpariaeth ar gyfer y ddwy yr un pryd yn yr un offeryn deddfwriaethol. Nid yw hynny gyfystyr â dweud bod angen cymorth llywodraeth wahanol a senedd wahanol ar Lywodraeth Cymru. Fel y nodwyd yn gyson, ac yn unol â'n hegwyddorion, byddem yn amddifadu ein hunain drwy beidio â mabwysiadu dull pragmatig o ymdrin â'r cyfleoedd a all gael eu cyflwyno drwy Filiau'r DU, a gallai hynny fod yn anfanteisiol i Gymru.

5. *Sut ydych yn ymateb i'r farn bod Llywodraeth y DU, i bob pwrpas, yn gosod rhan fawr o'r agenda deddfwriaethol yng Nghymru yn sgil dull gweithredu Llywodraeth Cymru?*

Mae rhaglenni deddfwriaethol diweddar Llywodraeth y DU wedi ymwthio'n sylweddol i'r setliad datganoli mewn ffyrdd sy'n gwbl annerbyniol, fel yr ydym wedi ei nodi'n glir ac yn gyson. Byddai'n gwbl gamarweiniol awgrymu bod hyn i'w briodoli i ddull Llywodraeth Cymru o weithredu.

Hyd yn oed yn yr amgylchiadau hynny pan fu inni argymhell i'r Senedd fod darpariaethau mewn meysydd datganoledig yn cael eu cynnwys ym Miliâu'r DU, nid yw hynny fel arfer oherwydd ein bod wedi cysylltu â Llywodraeth y DU i ofyn am hyn, ond oherwydd bod cyfle wedi codi i wneud hynny, sydd, yn ein tyb ni, yn ddigon cyson â'n hegwyddorion o ran deddfwriaeth y DU. Mae ein hargymhelliad terfynol i'r Senedd ynglŷn â chydysniad yn dibynnu yn y pen draw ar ganlyniadau ein gwaith o geisio sicrhau bod unrhyw ddarpariaeth o'r fath yn foddhaol o'n safbwynt ni.

6. *O ran y dirwedd wleidyddol bresennol, gwnaethoch sôn am sefyllfa lle mae Llywodraeth y DU yn deddfu, ac yn ceisio deddfu, mewn meysydd sydd wedi'u datganoli i Gymru (Cofnod y Trafodion 57). Er bod hynny, o bosibl, yn wir, mae hefyd yn wir i ddweud bod Llywodraeth y DU o bryd i'w gilydd yn cynnwys darpariaethau ym Miliâu'r DU ar gais Llywodraeth Cymru, fel mae eich sylwadau ym mharagraff 12 o'r trawsgrifiad yn ei awgrymu. Sut y gallai Llywodraeth Cymru fod yn fwy tryloyw yn hyn o beth?*

Fel yn fy llythyr ar 17 Mehefin, nodaf eto fy ymrwymiad i gydweithio â'r Senedd ar faterion yn ymwneud â chydysniad deddfwriaethol. I'r perwyl hwnnw, gallaf gadarnhau y byddwn ni, bob tro y bydd modd, yn gosod datganiad ysgrifenedig gerbron y Senedd ac yn hysbysu'r Pwyllgorau perthnasol pan fyddwn wedi ceisio darpariaeth yn un o Ffiliau'r DU, cyn i'r broses cydsyniad deddfwriaethol gychwyn. Bydd natur gwaith ymgysylltu Llywodraeth y DU ar unrhyw Fil o'r fath, ac unrhyw ofynion cyfrinachedd dros dro sy'n gysylltiedig â thrafodaethau rhynglywodraethol arno, yn effeithio ar y graddau y mae hyn yn bosibl.

7. *Yn y sesiwn dystiolaeth, gwnaethoch nodi: "Well, quite often, UK Government Bills will relate to things that aren't part of our programme for government, and then the issue arises whether there's something in that that we might want to seize the opportunity to do, that it might be advantageous to the people of Wales" (Cofnod y Trafodion 12).*

- i. Ar ba sail y mae Llywodraeth Cymru yn penderfynu bod y cyfleoedd hyn yn "fanteisiol" os nad ydynt wedi'u nodi yn y rhaglen lywodraethu ac os nad yw rhanddeiliaid yng Nghymru wedi bod yn destun gwaith ymgynghori neu broses o gasglu tystiolaeth?*
- ii. Yn gyffredinol, beth yw hyd y broses o wneud penderfyniadau? Os yw weithiau ond yn cymryd ychydig wythnosau, fel yr ydych yn ei awgrymu (Cofnod y Trafodion 75), a fyddai modd i chi egluro sut y gall hyn hyrwyddo deddfu da?*

Mae sefyllfa pob Bil, wrth gwrs, yn amrywio fesul achos. Ar y cyfan, mae ein penderfyniadau wedi'u seilio ar ein hasesiad o rinweddau cynnwys darpariaeth yn un o Ffiliau'r DU, gan ddefnyddio unrhyw wybodaeth, ymgynghoriad, neu waith casglu tystiolaeth sydd eisoes ar gael, neu y gellir eu cael mewn cyfnod perthnasol. Yn amlwg, po gynharaf y mae Llywodraeth y DU yn ymgysylltu â ni ar Fil, a pho fwyaf agored yw Llywodraeth y DU ynglŷn

â'i chynigion deddfwriaethol, mwyaf yw'r cyfle inni ymgysylltu â rhanddeiliaid a phartneriaid yng Nghymru, a dwyn y Bil i sylw'r Senedd a'i Phwyllgorau perthnasol.

Er enghraifft, byddwch yn gwybod am ein gwaith helaeth o ymwneud â'r Bil Caffael. Ym mis Rhagfyr 2020, cyhoeddodd Llywodraeth y DU Bapur Gwyrdd o'r enw 'Transforming Public Procurement', a sbardunodd ymgysylltu mwy dwys rhwng Llywodraeth Cymru a Llywodraeth y DU ar y materion o dan sylw. Yn 2021, gwnaethom gynnal cyfres o ddigwyddiadau i randdeiliaid ar ddiwygiadau i ddeddfwriaeth gaffael, gan gynnwys ystyried addasrwydd cynigion ym Mhapur Gwyrdd Llywodraeth y DU. Mewn arolwg a gynhaliwyd yn sgil y digwyddiadau i randdeiliaid, nododd mwyafrif y rhanddeiliaid yng Nghymru eu bod yn fodlon â chyfeiriad y cynigion yn y Papur Gwyrdd. Yn dilyn y gwaith o ymgysylltu â rhanddeiliaid yng Nghymru a'r broses well o rannu gwybodaeth, yn ogystal â chael sicrwydd ysgrifenedig gan Lywodraeth y DU, cyhoeddodd y Gweinidog Cyllid a Llywodraeth Leol Ddatganiad Ysgrifenedig ar 18 Awst 2021 yn amlinellu y byddai darpariaeth ar gyfer Awdurdodau Contractio Cymru yn cael ei gwneud ym Mil Llywodraeth y DU. Rydym wedi parhau i ymgysylltu â Llywodraeth y DU ar ddatblygiad y Bil hwn, a byddwch yn gwybod am ein memoranda cydsyniad deddfwriaethol hyd yma.

Byddwch hefyd yn gwybod am y Bil Diwygiadau Iechyd Meddwl sydd ar ddod. Mae'r Dirprwy Weinidog Iechyd Meddwl a Llesiant wedi ei drafod yn y Senedd eisoes, ac rydym yn cefnogi'r Bil o ran egwyddor. Mae cynigion yn y Bil hwnnw yn deillio o adolygiad annibynnol yn 2018, a Phapur Gwyn gan Lywodraeth y DU yn 2021. Cafodd ymateb Llywodraeth Cymru ei lywio gan grŵp cyfeirio a sefydlwyd, yn cynnwys cynrychiolwyr o Goleg Brenhinol y Seiciatryddion, GIG Cymru, Arolygiaeth Gofal Iechyd Cymru, a Gofal Cymdeithasol Cymru. Cawsom hefyd sesiynau ffocws er mwyn rhoi ein safbwyntiau arfaethedig ar brawf gyda grwpiau allweddol, gan gynnwys Cynghrair Iechyd Meddwl Cymru, y Bwrdd Partneriaeth Cenedlaethol ar gyfer Iechyd Meddwl, a Llywydd Tribiwnlys Adolygu Iechyd Meddwl Cymru. Cyfrannodd y gwaith ymgysylltu helaeth hwn at ein safbwynt presennol. Mae'r gwaith yn parhau ar ddatblygu'r Bil hwnnw, a'r disgwyl yw y bydd yn cael ei gyflwyno tua diwedd y flwyddyn.

8. Pa gamau y bydd Llywodraeth Cymru yn eu cymryd i leihau'r diffyg democrataidd sy'n codi yn sgil penderfyniad gan Lywodraeth Cymru i ddefnyddio Llywodraeth y DU a Senedd y DU i ddeddfu mewn meysydd datganoledig, ac i wella'r strwythur cyfansoddiadol presennol yr ydych yn cyfeirio ato (Cofnod y Trafodion 58)?

Gwaith aneffeithiol gan Lywodraeth y DU o ymgysylltu â Llywodraeth Cymru yw un o'r rhwystrau mwyaf rhag gweithrediad didrafferth y broses cydsyniad deddfwriaethol bresennol. Mae'n un o blith sawl rheswm pam rydym yn pwysleisio'n rheolaidd wrth Lywodraeth y DU bwysigrwydd gwybodaeth ac ymgysylltu, fel y gallwn ymgysylltu'n briodol â'r Senedd yn ei thro ac mewn da bryd.

Hoffem sicrhau bod y Senedd yn cael y cyfle a'r hyblygrwydd mwyaf i graffu ar ddefnyddio Biliau Senedd y DU o fewn y cyfyngiadau a osodir gan y broses a dull gweithredu Llywodraeth y DU.

Mae'n anochel na fydd gwaith y Senedd o graffu ar ddeddfwriaeth o'r fath mor fanwl â'r gwaith craffu yn achos deddfwriaeth a wneir yn y Senedd. Oherwydd hynny, rydym wedi ymrwymo i sicrhau y ceir cymaint o waith craffu ag y bo modd drwy broses y memorandwm

cydsyniad deddfwriaethol, ac i gyfyngu ar ein hymwneud â Biliau'r DU mewn modd sy'n gyson â'n hegwyddorion.

Rydym yn parhau i geisio gweithio gyda Llywodraeth y DU a'r llywodraethau datganoledig eraill i gryfhau ffyrdd o weithio ac i wella dull Llywodraeth y DU o ymgysylltu ar ei rhaglen ddeddfwriaethol, gan gynnwys parch at gonfensiwn Sewel. Byddaf yn rhoi rhagor o wybodaeth am y gwaith hwn pan fydd modd gwneud hynny.

Bil Cyfraith yr UE a Ddargedwir

9. *A fyddai modd i chi egluro:*

- i. *a ydych yn gweithio gyda Llywodraeth y DU ar Fil Cyfraith yr UE a Ddargedwir (neu Fil "Rhyddidau Brexit"), ac a ydych yn bwriadu sicrhau bod darpariaethau'r Bil yn gymwys i Gymru?*
- ii. *a yw Llywodraeth Cymru yn cytuno â datganiadau / cynigion Llywodraeth y DU ar gyfer diwygio statws cyfraith yr UE a ddargedwir? Os nad yw'n cytuno, beth yw safbwynt Llywodraeth Cymru ar ddiwygio statws cyfraith yr UE a ddargedwir?*

Ym mis Mai, cwrddais â'r Gwir Anrhydeddus Jacob Rees-Mogg AS, y Gweinidog Gwladol dros Gyfleoedd Brexit ac Effeithlonrwydd y Llywodraeth, i drafod Bil Cyfraith yr UE a Ddargedwir. Mae fy swyddogion wedi cael cyfarfodydd rheolaidd â thîm y Bil lle y mae gwybodaeth ddangosol a dros dro am y syniadau sy'n sail i'r Bil wedi'u rhannu, gan gynnwys ei berthnasedd i Gymru.

Nid yw Llywodraeth Cymru o reidrwydd yn gwrthwynebu'r cysyniad o ailedrych ar y corff o gyfreithiau'r UE a etifeddwyd gennym wrth ymadael â'r UE, neu ddulliau pragmatig a chymesur o'i alluogi i gael ei ddiweddarau dros amser mewn modd sy'n parchu'r setliad datganoli. Ond byddem yn gwrthwynebu unrhyw weithredoedd a allai olygu bod Llywodraeth y DU yn ceisio gostwng safonau ac amddiffyniadau gwerthfawr drwy ddadreoleiddio ideolegol, neu unrhyw weithredoedd nad ydynt yn parchu datganoli, neu, yn waeth byth, yn ei danseilio.

10. *Mae Llywodraeth y DU wedi dweud y bydd y Bil yn cynnwys pŵer wedi'i dargedu at ddibenion cyflymu'r broses o ddiwygio neu ddiwygio cyfraith yr UE a ddargedwir. Beth yw eich ymateb i hynny?*

Mae'n hanfodol bwysig i bobl a busnesau Cymru fod unrhyw gynigion i newid cyfraith yr UE a ddargedwir yn cael eu hasesu'n llwyr ac yn cael eu hystyried yng nghyd-destun cyfansoddiadol y setliadau datganoli cyn gwneud unrhyw benderfyniadau, gan gynnwys parchu'r darpariaethau a'r ffyrdd o weithio a adlewyrchir mewn Fframweithiau Cyffredin y cytunwyd arnynt.

11. *Gwnaethoch sôn am y posibilrwydd o ddefnyddio cymalau machlud yn y Bil, ac o ganlyniad i hynny, yr angen posibl i wirio miloedd o ddarnau o ddeddfwriaeth (Cofnod y Trafodion 83). Pa baratoadau sydd wedi'u gwneud yn fewnol gan Lywodraeth Cymru rhag ofn y bydd gofyn gwneud hyn?*

Mae fy swyddogion, ynghyd â swyddogion Llywodraeth yr Alban a Gweithrediaeth Gogledd Iwerddon, wedi cyflwyno sylwadau cryf yn gofyn i adrannau Llywodraeth y DU rannu'r ddealltwriaeth o'r rhaniad, yng nghyfraith yr UE a ddargedwir, rhwng cyfreithiau datganoledig a'r rhai a gedwir yn ôl. Mae hynny'n cydnabod y bydd angen i adrannau

Llywodraeth y DU nodi hynny, beth bynnag, fel rhan o'u gwaith. Nid yw hynny wedi dod i law hyd yma.

Ni chredwn y dylai'r Llywodraethau Datganoledig orfod cynnal ymarferion dadansoddi cwbl ar wahân yn hyn o beth, a hynny'n bennaf o ystyried maint y dasg ac mai menter gan Lywodraeth y DU yw hon sy'n seiliedig ar amserlen fypwyol ganddi, a chan gofio ein bod wedi gofyn am waith ar y cyd yn y cyswllt hwn.

12. Gwnaethoch sôn hefyd am eich trafodaethau gyda'r Gwir Anrhydeddus Jacob Rees-Mogg AS, sef y Gweinidog Gwladol dros Gyfleoedd Brexit ac Effeithlonrwydd y Llywodraeth, gan nodi: "I certainly was given the assurances I hoped for at that time, that there may be areas there where we do not agree and that we want these matters to be retained." (Cofnod y Trafodion 83). A fyddai modd i chi gadarnhau pa faterion neu feysydd penodol o gyfraith yr UE a ddargedwir y mae Llywodraeth Cymru wedi'u nodi ar hyn o bryd, ac a godwyd y materion neu'r meysydd hyn gyda Mr Rees-Mogg?

O ystyried bod Llywodraeth y DU wedi nodi dros 2,400 o gyfreithiau'r UE a ddargedwir, gan eu cyhoeddi yn ei chatalog cysylltiedig, nid yw Llywodraeth Cymru wedi cynnal ei dadansoddiad ei hun ar wahân gan fod hynny'n ymgymeriad sylweddol iawn. Er hynny, rydym wedi gwneud cais ar y cyd â Llywodraeth yr Alban a Gweithrediaeth Gogledd Iwerddon i Lywodraeth y DU rannu â ni, ar sail ei dadansoddiad ei hun, pa gyfreithiau'r UE a ddargedwir sydd o fewn cymhwysedd datganoledig.

13. A fyddai modd i chi gadarnhau pa warantau yr ydych wedi'u cael na fydd y Bil yn newid statws cyfraith yr UE a ddargedwir mewn meysydd datganoledig, os nad yw Llywodraeth Cymru am i'r statws hwnnw gael ei newid?

Nid oes unrhyw warantau wedi'u rhoi na fydd y Bil yn newid statws cyfraith yr UE a ddargedwir mewn meysydd datganoledig. Byddwn yn parhau i bwysu ar Lywodraeth y DU i sicrhau bod y Bil yn parchu setliad datganoli Cymru.

14. Mae Llywodraeth y DU wedi awgrymu y bydd y Bil yn newid statws cyfraith yr UE a ddargedwir fel y gall y llysoedd ei dehongli. Beth yw eich ymateb i hynny?

Mae dogfen 'The Benefits of Brexit' Llywodraeth y DU, yn ogystal â chynnig adolygu statws rhai mathau o gyfraith yr UE a ddargedwir, yn amlinellu ei chynlluniau i ystyried cael gwared ar effaith barhaus goruchafiaeth cyfraith yr UE dros gyfraith ddomestig a wnaed cyn diwedd y cyfnod pontio; i ystyried i ba raddau y dylai llysoedd domestig ddilyn penderfyniadau hanesyddol llysoedd yr UE; ac i ystyried rôl egwyddorion cyffredinol cyfraith yr UE mewn perthynas â chyfraith yr UE a ddargedwir (ymhlith nifer o gynigion eraill). Pe bai'r holl gynigion hyn neu unrhyw un ohonynt yn cael eu hadlewyrchu mewn deddfwriaeth ddrafft, gallai hyn effeithio ar y modd y mae'n ofynnol ar hyn o bryd i lysoedd ddehongli cyfraith yr UE a ddargedwir.

Fel uchod, mae'n bwysig bod unrhyw gynigion i newid cyfraith yr UE a ddargedwir yn cael eu hasesu'n llawn a'u hystyried yng nghyd-destun cyfansoddiadol y setliadau datganoli cyn gwneud unrhyw benderfyniadau, gan gynnwys parchu'r darpariaethau a'r ffyrdd o weithio a adlewyrchir mewn Fframweithiau Cyffredin y cytunwyd arnynt.

Bil Protocol Gogledd Iwerddon

15. A fyddai modd i chi egluro a yw'r Bil, ym marn Llywodraeth Cymru, yn gyfystyr â thorri cyfraith ryngwladol?

Yn ôl ei chyfaddefiad ei hun, mae Llywodraeth y DU wedi dewis cyflwyno Bil a fyddai, o'i ddeddfu a'i weithredu, yn torri'r rhwymedigaethau rhyngwladol yr ymgwymerodd â hwy o'i gwirfodd pan gytunodd ar Brotocol Gogledd Iwerddon, fel rhan o'r Cytundeb Ymadael â'r UE. Yn ei geiriau ei hun, mae Llywodraeth y Deyrnas Unedig wedi: "decided to introduce legislative measures which, on entry into force, envisage the non-performance of certain obligations". Mae Llywodraeth y DU yn ceisio cyfiawnhau hyn ar sail yr athrawiaeth "rheidrwydd" mewn cyfraith ryngwladol, er bod nifer o sylwebwyr cyfreithiol arbenigol annibynnol eisoes wedi herio hygrededd y safbwynt hwn.

Mae cydymffurfio â chyfraith ryngwladol yn fater y mae Llywodraeth Cymru yn gwbl o ddifrif yn ei gylch. Rydym yn cwestiynu a fydd Llywodraeth y DU yn gallu dangos bod y gofynion ar gyfer amddiffyn rheidrwydd yn cael eu bodloni (gan nodi bod nifer o gyfreithwyr a sylwebyddion uchel eu parch wedi codi pryderon tebyg), fel bod modd i'r methiant i gyflawni rhwymedigaethau rhyngwladol, fel y'i rhagwelir gan y Bil, gael ei gyfiawnhau o dan gyfraith ryngwladol. Fodd bynnag, Llys Cyfiawnder Ewrop fydd yn dyfarnu ar y pwynt hwn yn y pen draw.

16. A yw Llywodraeth y DU wedi rhoi unrhyw syniad i Lywodraeth Cymru o'r pwerau posibl y gellid eu rhoi i Weinidogion Cymru o dan y Bil, ac at ba ddibenion?

Ysgrifennodd yr Ysgrifennydd Tramor at Weinidog yr Economi, gan ddweud bod elfennau o'r Bil o fewn cymhwysedd deddfwriaethol y Senedd a chan ofyn am gadarnhad bod Llywodraeth Cymru yn fodlon cytuno mewn egwyddor i gefnogi cynnig cydsyniad deddfwriaethol yn y Senedd.

Er bod y gwaith o ddadansoddi'r Bil (na welsom mohono tan y diwrnod y cafodd ei gyflwyno) yn parhau, mae'n amlwg ei fod yn rhoi nifer o bwerau gwneud rheoliadau hynod eang i Weinidogion y Goron a bod cymal 22(6) o'r Bil yn darparu pŵer i Weinidogion y Goron is-ddirprwyo'r hawl i arfer pob un o'r pwerau neu unrhyw un o'r pwerau sy'n cael eu darparu iddynt yn y Bil i Weinidogion Cymru neu Weinidogion Llywodraeth ddatganoledig arall. Nid ydym wedi cael unrhyw arwydd pellach gan Lywodraeth y DU ynghylch pa bwerau y mae'n rhag-weld y gellid eu rhoi o dan y cymal hwn, i bwy, nac at ba ddiben.

Ar hyn o bryd rydym wrthi'n ystyried y darpariaethau yn y Bil yn fanwl er mwyn sefydlu'r goblygiadau i'n buddiannau, ein pwerau a'n cyfrifoldebau datganoledig, yn ogystal ag ystyried goblygiadau cyfansoddiadol ehangach y Bil.

17. Gwnaethoch gyfeirio at eich pryderon ynghylch a fyddai modd i'r Senedd gydsynio i Fil sydd, i bob pwrpas, yn cyfreithloni anghyfreithlondeb (Cofnod y Trafodion 145). A fyddai modd i chi egluro eich pryderon penodol ar y mater hwn?

Er bod Llywodraeth y DU yn derbyn bod y Bil yn golygu peidio â chyflawni rhwymedigaethau rhyngwladol y DU, mae'n ceisio cyfiawnhau hyn ar sail yr athrawiaeth "rheidrwydd" mewn cyfraith ryngwladol. Mae nifer o sylwebwyr cyfreithiol arbenigol annibynnol eisoes wedi herio hygrededd y safbwynt hwn. Mae cydymffurfio â chyfraith ryngwladol yn fater y mae Llywodraeth Cymru yn gwbl o ddifrif yn ei gylch. Mae hwn yn fater cymhleth, a fydd yn rhan hanfodol o'n gwaith sydd ar y gweill i ystyried y Bil.

Rydym wedi datgan yn glir yn gyson y dylai materion sy'n gysylltiedig â Phrotocol Gogledd Iwerddon gael eu datrys drwy negodiadau rhwng y DU a'r UE.

18. Beth yw goblygiadau'r Bil i Gymru, gan gynnwys eich asesiad o feysydd gwaith eraill o fewn eich portffolio, gan gynnwys y fframweithiau cyffredin a chysylltiadau rhynglywodraethol?

Gallai newidiadau i Brotocol Gogledd Iwerddon olygu bod angen diwygio cytundebau Fframweithiau Cyffredin. Drafftwyd y fframweithiau a chytunwyd arnynt ar sail pedair gwlad a byddai unrhyw newidiadau yn cael eu cloriannu fesul achos.

Mae darpariaethau yn y Bil sy'n gorgyffwrdd â materion datganoledig, ac rydym yn rhoi ystyriaeth ddyladwy iddynt, yn ogystal ag i effeithiau ehangach y Bil.

Fodd bynnag, mae diffyg unrhyw ymgysylltu ystyrlon ymlaen llaw gan Lywodraeth y DU yn amlwg yn mynd yn groes i'r egwyddorion a'r trefniadau gweithio rhwng y DU a'r llywodraethau datganoledig, y cytunwyd arnynt ar y cyd ac a nodwyd yn yr Adolygiad o Gysylltiadau Rhynglywodraethol. Mae'n bwysig fod Llywodraeth y DU yn glynu wrth yr ymrwymadau y cytunodd iddynt yn y Fframweithiau Cyffredin ac mae hynny'n fater yr ydym yn ei godi gyda hwy.

Ymwahanu ac aliniad

19. O ystyried y ffaith nad yw Llywodraeth Cymru mewn sefyllfa i fonitro'n barhaus aliniad cyfraith yr UE â chyfraith bresennol Cymru ac unrhyw achosion o ymwahanu (Cofnod y Trafodion 91), sut y gall y Llywodraeth wybod a yw safonau yng Nghymru yn cyd-fynd â datblygiadau yn yr UE?

Mewn meysydd y mae Fframweithiau Cyffredin yn ymdrin â hwy a thrwy gymryd rhan mewn trafodaethau â'r o dan y Cytundeb Masnach a Chydweithredu, mae swyddogion Llywodraeth Cymru yn gweithio'n agos gyda'u cymheiriaid yn Llywodraethau eraill y DU ac yn rhannu gwybodaeth, gan gynnwys ynghylch datblygiadau perthnasol yng nghyfraith yr UE a goblygiadau Protocol Gogledd Iwerddon. Mae swyddogion yn ein swyddfa ym Mrwsel hefyd yn rhoi gwybodaeth am ddatblygiadau polisi o bwys yn yr UE.

Yn y Cytundeb Masnach a Chydweithredu ceir pennod hefyd ar Arferion Rheoleiddiol Da a Chydweithredu ar Reoleiddio sy'n ei gwneud yn ofynnol cyhoeddi newidiadau perthnasol i reoliadau yn yr UE a'r DU ac sy'n annog arferion rheoleiddiol da.

20. Pa effaith y mae'r diffyg monitro hwn yn ei chael ar waith Llywodraeth Cymru o ran llunio polisiau a'i dull o gyflwyno cynigion deddfwriaethol newydd?

Mae ffyrdd o ddeall perthnasedd datblygiadau allweddol ar lefel yr UE, fel yr amlinellir hwy yn yr ateb i'r cwestiwn blaenorol, yn rhan o'r dull o fynd ati i ddatblygu polisiau da.

21. Pa effaith y mae ymwahanu rhwng y DU a'r UE ers diwedd y cyfnod pontio yn ei chael ar waith Llywodraeth Cymru o ran llunio polisiau a'i dull o gyflwyno cynigion deddfwriaethol newydd?

Fel yr amlinellir uchod, mae ffyrdd o ddeall perthnasedd datblygiadau allweddol ar lefel yr UE, fel yr amlinellir hwy yn yr ateb i'r cwestiwn cynharach, yn rhan o'r dull o fynd ati i ddatblygu polisiau da. Ers diwedd y cyfnod pontio, ni fu fawr o sgôp ar gyfer llawer iawn o

ymwahanu rhwng y DU a'r UE. Byddai'r effaith ar lunio polisiâu ac ar y dull gweithredu yng Nghymru yn cael ei ystyried fesul achos.

Cysylltiadau rhynglywodraethol

22. Pam y cafodd cyfarfod arfaethedig y Pwyllgor Sefydlog Rhyngweinidogol ei ohirio ddwywaith ym mis Mehefin?

Cafodd y Pwyllgor Sefydlog Rhyngweinidogol ei ohirio er mwyn sicrhau bod yr holl Weinidogion perthnasol o bob Llywodraeth yn gallu bod yn bresennol.

Mae pob Llywodraeth yn ymdrechu i gadw at ddyddiadau cyfarfodydd y cytunwyd arnynt; ond gohirio oedd y dewis gorau y tro hwn er mwyn sicrhau y gellid bwrw ymlaen â phob eitem ar yr agenda drwy drafod ac ymgysylltu ystyrlon.

23. Sut mae'r Pwyllgor Sefydlog Rhyngweinidogol yn mynd ati o ran cyflawni ei gyfrifoldebau dros oruchwylio cysylltiadau rhynglywodraethol, a hynny mewn perthynas â'r eitemau a ganlyn:

- i. gwella cydweithio ar raglen ddeddfwriaethol Llywodraeth y DU;*
- ii. goruchwylio'r fframweithiau cyffredin a marchnad fewnol y DU;*
- iii. goruchwylio cysylltiadau rhyngwladol?*

Fel y crybwyllwyd eisoes, nod mecanweithiau'r Adolygiad Rhynglywodraethol yw gwella cydweithio gan gynnwys ar raglen ddeddfwriaethol Llywodraeth y DU ar draws y pedair llywodraeth.

Er bod arwyddion cadarnhaol o du Llywodraeth y DU o ran gwella ei dull o ymgysylltu yn ystod y sesiwn hon, mae gennyf bryderon dwys ynglŷn â'r dull gweithredu a welwyd mewn perthynas â nifer o Filiau, gan gynnwys Bil Protocol Gogledd Iwerddon, y Bil Technoleg Enetig (Bridio Manwl) a'r Bil Hawliau. Mae'r rhain yn faterion o'r pwys mwyaf, ac mae dull gweithredu Llywodraeth y DU wedi bod yn annerbyniol.

Codais y materion hyn yng nghyfarfod diwethaf y Pwyllgor Sefydlog Rhyngweinidogol a gynhaliwyd ar 29 Mehefin, ynghyd â'r testun hollol annerbyniol gan Lywodraeth y DU sy'n awgrymu y byddai'n ceisio diddymu Deddf Undebau Llafur (Cymru).

Rydym yn rhag-weld y bydd agenda cyfarfodydd y Pwyllgor Sefydlog Rhyngweinidogol yn y dyfodol yn cynnwys eitemau ar Fframweithiau Cyffredin, y farchnad fewnol a chysylltiadau rhyngwladol; fodd bynnag, mae'r flaenraglen waith yn dal i gael ei datblygu rhwng y llywodraethau.

24. Yn sgil eich sylwadau ynghylch y broses o ddatrys anghydfodau (Cofnod y Trafodion 102-118), a ydych yn bwriadu codi unrhyw anghytundebau rhynglywodraethol fel anghydfodau drwy'r broses hon, yn enwedig o ran y diffyg ymgysylltu ar rai o Filiau allweddol y DU?

Mae'r broses ffurfiol o ddatrys anghydfodau yn parhau i fod yn ddewis sydd ar gael inni a byddwn yn ystyried defnyddio'r broses yn ofalus, fel dewis olaf, os yw pob llwybr arall wedi'i ddihysbyddu.

25. Rydym wedi cael copi o'r ohebiaeth a anfonwyd gan Bwyllgor Cyfansoddiad Tŷ'r Arglwyddi ynghylch adolygiad Llywodraeth y DU o Lawlyfr y Cabinet. A fyddai modd i chi gadarnhau pa drafodaethau yr ydych wedi'u cael â Llywodraeth y DU ynghylch yr adolygiad hwn?

Nid ydym yn credu bod Llywodraeth y DU wedi cysylltu â Llywodraeth Cymru mewn perthynas â'r adolygiad hwn.

26. Byddem yn gwerthfawrogi eich sylwadau ynghylch rôl y Llawlyfr (os o gwbl) yn y broses o feithrin cysylltiadau rhynglywodraethol, ac ynghylch sut y dylid ei ddiweddarau (os o gwbl)?

Byddem yn disgwyl i Bennod 8, yn benodol, gael ei diweddarau i adlewyrchu'r Adolygiad o Gysylltiadau Rhynglywodraethol yn llawn, gan gynnwys egwyddorion gweithio ar y cyd.

Deddf Marchnad Fewnol y DU 2020

27. Os nad yw ymgyfreitha Llywodraeth Cymru mewn perthynas â Deddf Marchnad Fewnol y DU 2020 yn llwyddiannus, a fydd y Llywodraeth yn ceisio eithriadau pellach o dan delerau'r Ddeddf?

Mae'n rhy gynnar i ddyfalu ynghylch canlyniadau dyfarniad yn y dyfodol, ond byddwn parhau i roi gwybodaeth i'r Senedd wrth i'r mater hwn fynd rhagddo.

28. Os na ellir sicrhau eithriadau, pa effaith y bydd hyn yn ei chael ar raglen ddeddfwriaethol Llywodraeth Cymru?

Safbwynt Llywodraeth Cymru o hyd yw nad yw Deddf Marchnad Fewnol y DU wedi cael yr effaith ar gymhwysedd y Senedd y mae'n honni ei bod wedi'i chael. Yn y cyd-destun hwn, ni fydd sicrhau eithriadau (neu fel arall) yn effeithio'n uniongyrchol ar raglen ddeddfwriaethol Llywodraeth Cymru.

29. A fyddai modd i chi gadarnhau y bydd Llywodraeth Cymru yn hysbysu'r Senedd am unrhyw anghydfodau gyda Llywodraeth y DU ynghylch eithriadau? Ar ba bwyt yn y broses yr ydych yn bwriadu darparu hysbysiadau o'r fath?

Rwyf yn parhau'n ymrwymedig i roi'r wybodaeth ddiweddaraf i'r Senedd am hynt a gweithgareddau'r rhaglen Fframweithiau Cyffredin. Mae'r gwaith yn parhau rhwng swyddogion ar ddatblygu mecanwaith adrodd a monitro ystyrion, llawn gwybodaeth ar gyfer Fframweithiau Cyffredin yn y dyfodol. Rwy'n edrych ymlaen at rannu hyn gyda'r Pwyllgor pan gytunir arno ar lefel Weinidogol.

30. Rydym yn cydnabod eich sylwadau am y sefyllfa ynghylch y Bil Technoleg Enetig (Bridio Manwl) (Cofnod y Trafodion 128-136). Fodd bynnag, a fyddai modd i chi egluro a yw'r cynigion i newid y prosesau awdurdodi presennol ar gyfer organebau a addaswyd yn enetig, ym marn Llywodraeth Cymru, yn dod o fewn yr eithriadau sy'n ymwneud â diogelu iechyd pobl, anifeiliaid neu blanhigion?

Mae Llywodraeth Cymru wedi dweud wrth Lywodraeth y DU, mewn nifer o gyfarfodydd rhwng swyddogion, y dylai effeithiau'r Bil Technoleg Enetig (Bridio Manwl), sy'n rhychwantu nifer o feysydd yn y Fframweithiau Cyffredin, fod wedi cael eu rhannu'n gynharach gyda'r Llywodraethau datganoledig o dan y broses gydnabyddedig ar gyfer y Fframweithiau Cyffredin. Mae'r mater hwn yn dal i gael ei ystyried.

31. A fyddai modd i chi nodi asesiad Llywodraeth Cymru o effaith bosibl Bil Protocol Gogledd Iwerddon ar Ddeddf Marchnad Fewnol y DU 2020, gan gynnwys yr effaith ar y pwerau a ddarperir i Weinidogion Cymru mewn perthynas â'r Protocol?

Er bod y gwaith o ddadansoddi'r Bil yn llawn yn parhau, fe fydd, fel y'i cyflwynwyd, yn diwygio gweithrediad y Protocol drwy ddatgymhwyso elfennau o'r Protocol mewn cyfraith ddomestig. Fel y crybwyllwyd eisoes, mae'r Bil yn rhoi i Weinidogion y Goron nifer o bwerau eang iawn o ran gwneud rheoliadau ac mae'n cynnwys pŵer yng nghymal 22(6) i Weinidogion y Goron is-ddirprwyo'r hawl i arfer pob un o'r pwerau neu unrhyw un o'r pwerau a ddarperir iddynt yn y Bil i Weinidogion Cymru neu Weinidogion Llywodraeth ddatganoledig arall. Nid ydym wedi cael unrhyw arwydd pellach gan Lywodraeth y DU ynghylch pa bwerau y mae'n rhag-weld y gellid eu rhoi o dan y cymal hwn, i bwy, nac at ba ddiben.

Fframweithiau cyffredin

32. Rydym yn nodi eich sylwadau ar effaith y fframweithiau cyffredin o ran deddfu ar gyfer Cymru. A fyddai modd i chi ddarparu'r wybodaeth ddiweddaraf ynghylch a fu unrhyw achosion o Lywodraeth Cymru yn newid cyfraith neu bolisi, neu'n peidio â bwrw ymlaen â newid i gyfraith neu bolisi, yn sgil trafodaeth rynglywodraethol drwy un o'r fframweithiau cyffredin?

Nid wyf yn ymwybodol o unrhyw faes lle nad ydym wedi gallu bwrw ymlaen â chynlluniau deddfwriaethol neu gynlluniau polisi. Fel egwyddor gyffredinol, mae trafodaeth rynglywodraethol drwy Fframweithiau Cyffredin yn fuddiol i ddatblygiad polisi ym mhob un o'r pedair gwlad.

33. Yn eich llythyr atom, dyddiedig 2 Mawrth 2022, gwnaethoch nodi y byddech yn synnu pe bai unrhyw oedi wedi digwydd o ran polisiau neu fentrau Llywodraeth Cymru ym meysydd y fframweithiau cyffredin, "gan fod prosesau'r Fframweithiau Cyffredin bellach yn rhan gynhenid o sut y caiff polisi ei ddatblygu yn y meysydd lle maent yn berthnasol." A fyddai modd i chi egluro sut yr ydych yn sicrhau nad yw gwneud penderfyniadau rhynglywodraethol drwy'r fframweithiau cyffredin yn arwain at wanhau rôl y Senedd a rhanddeiliaid Cymru yn y broses o lunio cyfreithiau a pholisiau ar gyfer Cymru?

Ni fydd y Fframweithiau Cyffredin yn newid y ffordd yr ydym yn ymgysylltu â'r Senedd ac yn ymgynghori â rhanddeiliaid. Mae Fframweithiau Cyffredin yn caniatáu sgôp ar gyfer ymwahanu a allai olygu gwneud deddfwriaeth drwy'r Senedd. Byddai deddfwriaeth o'r fath yn destun craffu gan y Senedd yn y modd arferol. Nid yw Fframweithiau Cyffredin ynddynt eu hunain yn cyfyngu ar rôl y Senedd.

34. Yn y llythyr dan sylw, gwnaethoch gytuno y dylai Llywodraeth Cymru ein hysbysu pan fydd anghydfod yn ymwneud â'r fframweithiau cyffredin yn cael ei gyfeirio at Weinidogion. Pam na roddodd Llywodraeth Cymru wybod i'r Senedd fod anghydfod wedi cael ei godi drwy'r fframwaith cyffredin ar adnoddau a gwastraff ynghylch y cais a wnaed am eithriad o Ddeddf Marchnad Fewnol y DU ar gyfer plastigion untro?

O ran yr anghydfod ynghylch yr eithriad ar gyfer plastigion untro, Llywodraeth yr Alban a geisiodd eithriad ac a gychwynnodd drafodaethau cynnar o dan y Fframwaith Adnoddau a Gwastraff. Cynigiwyd datrysiad gan swyddogion ac fe gytunwyd arno gan Weinidogion cyn i broses ffurfiol gael ei sbarduno. Dyma pam na chafodd y Pwyllgorau wybod.

Rwyf yn parhau i fod yn ymrwymedig i dryloywder y Rhaglen Fframweithiau Cyffredin ac i roi gwybod i'r Senedd pan godir anghydfod i lefel Gweinidogion, bod hynny gan Lywodraeth Cymru neu'n ymwneud â Llywodraeth Cymru.

35. Yn yr un llythyr, gwnaethoch hefyd gytuno y byddai Llywodraeth Cymru yn hysbysu'r Senedd mewn achosion lle mae deddfwriaeth yn ymwneud ag un o'r fframweithiau cyffredin. Nid yw Llywodraeth Cymru bob amser wedi hysbysu'r Senedd am y berthynas rhwng is-ddeddfwriaeth mewn maes polisi fframwaith cyffredin a'r fframwaith cyffredin dan sylw. A wnewch chi ymrwymo i wneud hyn?

Dim ond yn awr yr ydym yn dechrau gweld deddfwriaeth yn cael ei chyflwyno sy'n ymwneud â Fframweithiau Cyffredin, felly nid yw hyn wedi bod yn fater arferol. Ond, ydym - rydym yn gweld hyn yn rhan o arfer da.

Fel y nodwyd uchod, rwy'n parhau i fod yn ymrwymedig i roi'r wybodaeth ddiweddaraf i'r Senedd am hynt a gweithgareddau'r rhaglen Fframweithiau Cyffredin. Mae gwaith yn parhau rhwng swyddogion ar ddatblygu mecanwaith adrodd a monitro ystyrlon, llawn gwybodaeth ar gyfer Fframweithiau Cyffredin yn y dyfodol. Rwy'n edrych ymlaen at rannu hyn gyda'r Pwyllgor pan gytunir arnynt ar lefel Weinidogol.